

Lelaki OKU curi wang warga emas dan OKU lain dari ATM dipenjara tujuh bulan

KUCHING: Seorang lelaki OKU pendengaran dipenjara tujuh bulan oleh Mahkamah Majistret semalam kerana mencuri wang milik dua lelaki warga emas dan seorang individu orang kurang upaya (OKU) penglihatan dari mesin juruwang automatik (ATM) bank.

David Ngu Chung Hieng, 41, mengaku bersalah apabila didakwa secara berasingan atas tiga pertuduhan di hadapan Majistret Mason Jaro Lenya Barayan dan Majistret Ling Hui Chuan, kesemuanya dibuat mengikut Seksyen 379 Kanun Keseksaan.

Bagi dua pertuduhan dihadapinya, Mason memerintahkan tertuduh dipenjara tujuh dan lima bulan, sementara untuk satu lagi pertuduhan, Ling mengarahkan tertuduh dipenjara empat bulan.

Mahkamah memerintahkan kesemua hukuman penjara dikuatkuasakan mulai semalam.

Tertuduh didakwa melakukan kesemua kesalahan itu dalam tiga kejadian berasingan, masing-masing pada 30 Januari 2025, 18 Mac 2025 dan 30 Mac 2025 di cawangan-cawangan bank terletak di Stutong Parade, Jalan Setia Raja dan di King Centre di sini.

Dia didakwa mengambil wang RM1,500 milik mangsa lelaki OKU penglihatan serta RM1,200 dan RM500 milik dua orang lelaki warga emas masing-masing berusia 63 dan 76 tahun.

Fakta kes mendedahkan tertuduh kononnya membantu kesemua lelaki tersebut untuk mengeluarkan wang dari mesin ATM dan susulan itu, mangsa memasukkan kad ATM dan nombor PIN.

Tertuduh seterusnya menekan sejumlah duit dan menyerahkan semula kad kepada mangsa, namun tertuduh mengambil sebahagian wang daripada

mangsa sebelum melarikan diri dari tempat kejadian.

Selain itu, tertuduh juga dilaporkan tidak mengeluarkan sebarang kata-kata ketika melakukan perbuatan tersebut dan hanya menggunakan bahasa isyarat tangan kepada mangsa.

Susulan itu, kesemua mangsa tampil membuat laporan polis sehingga membawa kepada penangkapan tertuduh. Hasil siasatan polis mendapati semakan kamera litar tertutup (CCTV) menunjukkan tertuduh berada di lokasi kejadian dan melakukan kesalahan tersebut, malah hasil kawad cam juga mendapati mangsa-mangsa mengenali tertuduh.

Difahamkan juga, semakan lanjut mendapati tertuduh mempunyai 10 rekod jenayah.

Tertuduh diwakili peguam Brenda Chong dan Micheal Kong sementara kes dikendalikan oleh Pegawai Pendakwa Inspektor Nur Shafiq Nyaie Ilin.